

EHPEU **Pê Chyáng Hun Kat é Laiká** **(Ephesians)**

¹ Garai Gasang ô nau é eq rajung za, Hkrisduq Yesuq é lagyo nghut sù, ngò Poluq gi, Ehpesu myuq má nyí é, Hkrisduq Yesuq má lhumzui bang nghut é, haû sân-yúng bâng chyáng nguingón dang shit kyô kat lhê.

² Nga-nhûng é Îwa Garai Gasang eq Yhumsîng Yesuq Hkrisduq chyáng mâ é, jeju eq nguingón hkyô gi, nungmoq chyáng ru joq nyí sháng gaq ô!

Hkrisduq Mâ É, Woi-nyí Hkyô Shimân Jeju Pé

³ Mauhkûng htoq tsáng myhâng má, woi-nyí hkyô eq sêng é shimân jeju jung hkangmó lé, Hkrisduq má nga-nhúng lé shimân byi sù, nga-nhûng é Yhumsîng Yesuq Hkrisduq é Yhângwa, Garai Gasang gi, hkungsô wó nyí sháng gaq.

⁴ Hkâsu mù gâ le, nga-nhúng gi, Garai Gasâng é hí má, chyoiyúng é bang eq mara a bo é bang dut râ matú, Garai Gasang gi, mingkan lé a hpân shi mai, Hkrisduq Yesuq má nga-nhúng lé hkyin yu to bê nghut ri.

⁵ Hau htoq agó, Yhang, nga-nhúng lé chyitdap é yanmai, Yhang myit nguì ô nau é eq rajung za, Yesuq Hkrisduq mai yhangzô pé kut yu râ matú, hí mai nga-nhúng lé masat to bê nghut ri.

⁶ Haû mù, Yhang chyitdap é Sû* má, nga-nhúng lé laí laí byi bê nghut é, hpungwup shing kang bo é jeju chyunghuq lé, chòm hkya-on sháng.

⁷ Garai Gasang é agùn agó é jeju yanmai, nga-nhúng mara hkyut byi é hui luî, Yhang Zô é sui dông mai, nga-nhúng gi, Yhang má hkyi yù hkyô wó yu é nghut lhê.

⁸ Jeju haû lé gi, hpaqchyî byéng-yá eq sê gyô é nyan banshoq le kut, Yhang, nga-nhúng lé agùn agó byi bê nghut lhê.

⁹ Garai Gasang gi, Yhang myit ngui é eq rajung za, Hkrisduq dông mai kut râ matú hen to bê nghut é, Yhâng é zaú tô é hkyô lé, nga-nhúng lé shit bê nghut ri.

¹⁰ Sê gyo wuî é hkyô haû gi, lhoq dik râ ahkyíng jé jáng, mauhkûng htoq eq myigùng htoq mâ é lhunglhang lé, Hkrisduq má rading ralhum za kut râ nghut é hkyô nghut lhê.

¹¹ Hkrisduq má sâng-hi myit myoqbyù bang nghut é nga-nhúng gi, Yhâng é hpungwup shing kang lé hkya-on kungtôn sháng gaq ga,

¹² Garai Gasang gi, Yhang myit sôn tô é lhunglhang lé ban kut mù, Yhâng ô nau é dông, hí mai myit hpyit doqdân to bê eq rajung za, nga-nhúng lé le, Hkrisduq má hkyin yu to bê nghut ri.

¹³ Hau htoq agó, nungmoq le, nungmoq é hkyi yù hkyo é gabú danglù gâ é tengmán mungdang lé wó gyo kô é hkûn, Hkrisduq eq sêng é bang dut bekô nghut ri. Nungmoq gi, Hkrisduq lé lumjng

* **1:6** *Yhang chyitdap é Sû gâ é gi, Yesuq lé taí nau é nghut lhê.*

bekô nghut é yanmai, haû gidiq byî tô é Chyoiyúng Woi-nyí dizik htông tap byî é hui bekô nghut ri.

¹⁴ Garai Gasâng é hpungwup shingkang lé hkya-on râ matú, Yhang eq sêng é byu pé hkyi xe yù huí é hkyíng jé shoq, Chyoiyúng Woi-nyí haû gi, nga-nhông é muizè lé hkyak wó yû râ nghu é masat nghut ri.

Poluq Kyûdung Byî É Hkyô

¹⁵ Haû mù luí, Yhumsíng Yesuq lé nungmoq lumjíng é hkyô eq sân-yúng bang lhunglhang lé nungmoq chyitdap é hkyô lé, ngò wó gyô é yanmai,

¹⁶ ngò gi, ngá é kyûdung dang má nungmoq lé myit bun uchang, anum yhang, nungmoq é matú jeju hkya-ôn nyi lhê.

¹⁷ Nga-nhông é Yhumsíng Yesuq Hkrisduq é Garai Gasang nghut é, hpungwup shingkang bò sù haû Íwa gi, Yhang lé nungmoq je sé râ matú, hpaqchyî byéng-yá wó byî é eq san za wó sé nhang é Woi-nyí, nungmoq lé byi sháng gaq nghû, ngò, Yhâng chyáng dúng nyi lhê.

¹⁸ Hau htoq agó, Yhang, nungmoq lé ji yu é myit myoqbyù hkyô, hkasû é nghut é lé le, Yhâng é hpungwup shingkang bo é muizè gi, sân-yúng bâng chyáng agùn agó joq nyi é hkyô lé le, Yhâng é kô dik é a-tsam mó gi, lumjíng bang nga-nhông é matú nghut é lé le,

¹⁹ nungmoq wó sé râ matú, nungmoq é myit myoqjí lhoq gyeng byî é hui sháng gaq nghû, ngò kyûdung byî nyi lhê. A-tsam mó haû gi, Garai Gasang, Hkrisduq lé shi é mai lhoq dui toq yû mù,

²⁰ mauhkûng htoq tsáng myhâng má, Yhâng é loqyò hkyam shut zùng nhang é hkûn, chung é wum-o a-tsam mó eq rajung za nghut ri.

²¹ Hkrisduq gi, uphkang é, ahkáng ayá wó é, a-tsam bo é eq up zô é bang banshoq htoq má le, ahkuí pyat eq htang pyat má myhâng é myìng lhunghâng é htoq má le, je gyaú é sù nghut lhê.

²² Hau htoq agó, Garai Gasang gi, lhungháng lé Yhâng é hkyiwa ô má tô to luí, haú noqkuq hpûng é matú, Yhang lé, jung hkangmó é ushuq dut râ đông masat to bê nghut ri.

²³ Noqkuq hpúng haú gi, Hkrisduq é gungdu nghut luí, hkyô hkangmó má jung hkangmó lhoq byíng jup é Hkrisduq byíng nyi é nghut ri.

2

Hkrisduq Má Asak Dui É Hkyô

¹ Laí ló bê hkûn, nungmoq gi, tarâ lu laí é eq mara kut shut é hkyô pê é yanmai, shi tô é bang dut kô é nghut lhê.

² Haú hkûn, nungmoq gi, mingkan ngón hkyô pé má lhaq châng nyi kô é htoq agó, haú tarâ a cháng bâng é myit má ahkuí mù zuí nyi é sobyô nghut é, maulat lé up sù htâng châng nyi kô é bang nghut lhê.

³ Nga-nhúng banshoq bang le, yhangmoq su kut nyi laí lo é bang chyat nghut mù, yubak mara byíng é suisho ô naú gadaú hkyô má nyi é bang nghut é htoq agó, gungsho ô nau é hkyô pé eq myit é hkyô pé đông za châng wú é bang nghut lhê. Haú mù, góbang eq rajung za, nga-nhúng gi, Garai Gasâng

é nhikmo-yo hkyô eq gingdán wú é bang chyat nghut lhê.

⁴ Nghut kôlhang, shogyo nhikmyin myit gyaí bo é Garai Gasang gi, nga-nhúng, tarâ lu lai luí shi byuq bê bang dut kôlhang, Yhâng é chyitdap myit mó èq, nga-nhúng lé chyitdap luí, Hkrisduq eq rahá asak dù nhâng bê nghut ri.

⁵ Haû mù, nungmoq gi, Garaí jejú èq za hkyi yu é hui bekô nghut ri.

⁶ Garai Gasang gi, Hkrisduq Yesuq má, nga-nhúng lé, Yhâng é ge é hkyô shit bê nghut mù, a ung taí é Yhâng é jeju lé, htang pyat má wó shit sháng gaq ga,

⁷ nga-nhúng lé, Hkrisduq eq rahá lhoq dui toq yú mù, mauhkûng htoq tsáng myhâng má, Yhang eq rahá zùng nhang to bê nghut ri.

⁸ Hkâsu mù gâ le, nungmoq gi, lumjúng é dông mai Garaí jejú èq za hkyi yu é hui bekô nghut ri. Haû gi, nungmoq chyáng mâ é a nghut, Garai Gasâng jeju chyunghuq za ru nghut lhê.

⁹ Haû gi, yhumsing é muzó mai wó é a nghut é yanmai, ó yuq le nghutbun râ hkyô a joq.

¹⁰ Hkâsu mù gâ le, nga-nhúng gi, Garaí Gasâng é loqmú pé nghut mù, nga-nhúng zui saí râ matú, hí hí mai, Garai Gasang hen lajâng tô é ge é muzó pé lé zui saí râ matú, Hkrisduq Yesuq má hpan to hui bê bang nghut lhê.

Hkrisduq Má Rading Ralhum

¹¹ Haû mù luí, nungmoq gi, hí hkûn, hku lé lo é mai yhang tûngbaù pé nghut é hkyô lé le, byu loq èq za gungsho má kut é, "ahpyo-kuq hpyit hkâm bang" gâ é bang mai, nungmoq lé, "ahpyo-kuq

hpyit a hkâm bang" ga byi kô é hkyô lé le, myitbun keq.

¹² Haú u lé, nungmoq gi, Hkrisduq eq gâng lhûm tô é bang; Israelaq mingbyû a nghut é bang; dang-gidiq eq sêng é dangshikaq pé má gó ming byû nghut é bang; mingkan htoq má, myoqbyû jowò a joq é eq Garai a wó é bang nghut é lé, myitbun keq.

¹³ Nungmoq gi, hí hkûn wê gâng nyi é bang nghut kôlhang, ahkuî kúm, Hkrisduq é sui dông mai Hkrisduq Yesuq má shuî chyâng htep é hui bekô nghut ri.

¹⁴ Hkâsu mù gâ le, Yhânggùng yhang gi, nganhûng é nguingôn hkyô nghut ri. Yhang gi, gyoro má kyo tô é madin nghut é a naù a wom hkyô lé hpyoq hpyi pyám byi luî, haú í myû* dut nyi é lé, rahú za dut nhâng bê nghut ri.

¹⁵ Haú hkunmó pé eq hkang tô é tarâ pé bo é jep é tarâ lé, Yhâng é gungsho má lhoq htûm pyám bê nghut ri. Haú mù, Yhang ô nau é hkyô gi, haú í myû dut tô é lé, Yhânggùng má yhang, byû sik ramyû za hpan to râ matú nghut ri; haú dông, simsaq hkyô kut byi bê nghut ri.

¹⁶ Yhang gi, a naù a wôm lhûm é hkyô lé, haú tapzîng má lhoq htûm pyám byi mù, haú tapzîng dông mai, byû myu í myu é lé ragùng za kut luî, Garai Gasang eq xoq byi bê nghut ri.

¹⁷ Yhang gi, wê gâng nyi é bang† nungmoq lé le, chyâng htep nyi é bang‡ lé le, simsaq hkyo é danglù

* **2:14** *I myû gâ é gi, Israelaq byu pé eq tûngbaù pé lé gâ lhê. † 2:17* *Wê gâng nyi é bang gâ é gi, tûngbaù pé lé gâ lhê. ‡ 2:17* *Chyâng htep nyi é bang gâ é gi, Israelaq byu pé lé gâ lhê.*

lé hko kyo bê nghut ri.

¹⁸ Hkâsu mù gâ le, nga-nhúng í myû gi, Yhang dông mai, Woi-nyí ralhum zâ eq, haû Íwâ chyáng wàng râ hkyô dong bê nghut ri.

¹⁹ Hau é yanmai, nungmoq gi, tûngbaù pé eq byù bíng pé a nghut lô é za, Garaí é byu pé eq rahá, mingbyû wuì eq yhumbyù wuì chyat nghut bekô nghut luí,

²⁰ haû lagyô pé eq myiqhtoí pé, hi tô é apûn awang htoq má xuq tô é bang chyat nghut akô; Hkrisduq Yesuq yhang, haú mâ é ahkyak é htungchyûn luqgok dut bê nghut ri.

²¹ Yhang má, wahpang lhum gón xoq lhûm bùm é nghut mù, haû Yhumsíng má chyoiyúng noqkuq yhûm ralhum dut lò bê nghut ri.

²² Woi-nyí dông mai, Garai Gasang nyí râ jang dut râ matú, nungmoq le, Yhang má, wahpang su tsuq é chôm huí nyi bùm bekô nghut ri.

3

Poluq, Tûngbaù Pé É Tarâ Hkô Sará

¹ Haû su nghut mù, Hkrisduq Yesuq é hkyô lé, nungmoq tûngbaù pé chyáng hko kyô é yanmai, htongbyû dut sù, ngò Poluq gi, nungmoq é matú kyûdung byí lhê.

² Nungmoq lé dojaú râ é matú, ngo lé byí tô é Garaí Gasâng jeju ayá shí lé, nungmoq gè gè wó gyô wú bekô râ nghut lhê.

³ Haû gi, hí hkûn, ngò, tot é dông kê tô wú bê eq rajung za, haû zaú tô é hkyô lé, shing-rán dông ngo lé sé nhang é nghut ri.

4 Haú hkyô lé, nungmoq nghap wú é hkûn, Hkrisduq eq sêng é zaú tô é hkyô, ngò rago sê é lé, nungmoq wó sé kó râ nghut lhê.

5 Haú lé, lai lò bê ipyat pé mâ é byu pé lé a sé nhang é nghut kôhang, ahkuî gi, Garai Gasâng é chyoiyúng é, lagyô pé eq myiqhtoî pé lé, haú Woi-nyí eq hpông shit bê nghut ri.

6 Zaú tô é hkyô haú gi, gabú danglù dông mai, Hkrisduq Yesuq má, Israelaq byu pé eq rahá, tungbaù pé le, hkûng xoq bang wó dut luí, gungdu ralhûm é gungsho showui showang pé chyat dut é eq, danggidiq byi tô é lé wó chôm hkam yu é bang dut é hkyô nghut ri.

7 Yhâng é hpungwup a-tsam mai, ngo lé byi tô é Garai Gasâng jeju chyunghuq é yanmai, ngò gi, gabú danglù shî taí râ dui-nhâng zoshâng dut é nghut lhê.

8 Ngò gi, haú Garai Gasâng é byu pé mâ é tiq dik sù htoq má lhang je tiq sù nghut kôhang, haú Hkrisduq é a ung htoq taí é wó sùt hkyô lé, tungbaù pé chyáng hko kyo râ matú le,

9 haú lhunglhang lé hpan é Garai Gasang má, lai lò bê ipyat pé má zaú tô é, zaú tô é hkyô haú lé hkâsu kut tô é lé, yuq hkgangmó lé taí sân kyo râ matú le, jeju shî, ngo lé byi bê nghut ri.

10 Haú gi, nga-nhûng é Yhumsîng Hkrisduq Yesuq má lhoq pán bê nghut é, Yhang ahtum abyuq myit hpyit tô bê eq rajung za,

11 haú Garai Gasâng é hpaqchyî mó góng lé, noqkuq hpúng dông mauhkûng htoq tsáng myhâng mâ é uphkâng bang eq ahkáng ayá wó bang lé, ahkuî sé nhâng râ matú nghut lhê.

¹² Nga-nhúng gi, nga-nhùng é Yhumsîng Hkrisduq Yesuq eq rading ralhum za nghut é yanmai le, Yhang lé lumjîng é yanmai le, Garai Gasang chyáng, wám é myit eq a gyuq a wám é myit eq wó htep ê é nghut lhê.

¹³ Haû mù luî, ngò, nungmoq lé dúng tôngbán nau é gi, nungmoq é matú, ngò wuîhke jamjau hui zô é yanmai, nungmoq i-myit hkâgyui kó; haû gi, nungmoq é matú akyû bò rá hkyô nghut lhê.

Ehpesu Myuq Byu Pé Lé Kyûdung Byî É Hkyô

¹⁴ Haú pê é yanmai, ngò gi, haû Íwâ é hí má hkyihput htuq luî kyûdung é nghut lhê.

¹⁵ Mauhkûng eq myigùng htoq mâ é Yhâng é ikun byù lhunglhang gi, Yhâng chyáng mai myìng wó yu é chyat nghut lhê.

¹⁶ Nungmoq é lumjîng myit mai, nungmoq é i-myit unghkaû má Hkrisduq wó nyi nyi sháng gaq nghû,

¹⁷ Yhang é hpungwup shingkang bo é agùn agó wó sùt é mai, nungmoq é i-myit unghkaû mâ é sù lé, Yhâng é Woi-nyí dông, hpungwup a-tsâm eq wum-o lhoq kîng byi rá matú, ngò kyûdung byi lhê. Hau htoq agó, nungmoq gi, chyitdap myit má amyit chîn to luî, awang hi to mù,

¹⁸ sân-yúng bang eq rahá, hau é apyî, a-tsûng, myhâng, nik, hkâ-í nghut é lé, rago wó sé kôluî,

¹⁹ Garai Gasâng é gumjup é hkyô lhunglhang eq wó lhoq gumjup yù kó sháng gaq nghû, sê é nyan htoq má gyaú é Hkrisduq é chyitdap hkyô lé, nungmoq wó sé rá matú, ngò kyûdung byi lhê.

²⁰ Ahkuî, nga-nhùng é hkaû má mù zuî nyi é, Yhâng é wum-o a-tsâm é yanmai, nga-nhúng dúng

é banshoq eq myit é hkyô lhunglhang htoq je wó kut byí é Su chyáng,

²¹ haû noqkuq hpûng é yanmai le, Hkrisduq Yesuq é yanmai le, pyat pyat zaí zaí, ahtum abyuq, hpungwup shingkang rû bo nyi sháng gaq ô! Amen.

4

Hkrisduq É Gungdu Má Rading Ralhum Za

¹ Haû mù luí, nungmoq gi, nungmoq lé wut yù bê nghut mù, wut yu é hkyô eq gingdán é dông asak duì keq nghû, haû Yhumsing é yanmai, htóng lúng sù ngò Poluq gi, nungmoq lé lhoq pun lhoq kyîng kat lhê.

² Hkyô hkat hkanmó má i-myt lhoq nyhum é eq i-myt nú-nhâm nyi keq; myit hing é eq chyitdap myit mai rayuq eq rayuq hkam jân lhûm nyi keq.

³ Haû Woi-nyí èq byí é myit hui hkyô lé, ngu-ingón hkyô dông mai châng nyi râ matú, wó dut é í shikut nyi keq.

⁴ Nungmoq gi, wut yù hui kô é hkûn, myit my-oqbyù hkyô rashut za wut yù hui bekô nghut é eq rajung za, gungdu ralhum eq Woi-nyí ralhum za nghut nyi ri.

⁵ Yhumsing rayuq za, lumjîng hkyô rahkat za, bapisma ralhum za nghut nyi ri.

⁶ Banshoq bâng é Îwa nghut sù Garai Gasang le, rayuq za nghut nyi ri; Yhang gi, banshoq bâng é ahtoq má nghut luí, lhunglhang dông mai mù kut é eq lhunglhang é ahkaû má lúng nyi sù nghut ri.

⁷ Nghut kôlhang, nga-nhúng yuq hkgangmó gi, jeju chyunghuq lé, Hkrisduq mai ké byî é dông wó yu é nghut lhê.

⁸ Hau é yanmai,

"Yhang gi, myhang é jowò shut doq ló é hkûn, shúm zung é bang lé gi, shuî chùng mù, byu pé lé gi, chyunghuq tsing gàm byî ri."☆

ga, Chyúmdang má taî tô é nghut lhê.

⁹ Haû "doq ló" gâ é lichyúm gi, myigùng é a-o tsáng má le, Yhang gyó jé bê nghut lhê, gá naû é a nghut lhi?

¹⁰ Haû gyó lé é Sû gi, junghkang jungmó lé lhoq byíng jup râ matú, mauhkûng banshoq é ahtoq má doq ló é Sû yhang nghut lhê.

¹¹ Yhang gi, ra-am lé, lagyô pé, ra-am lé, myiqhtoî pé, ra-am lé, gabú danglù hko kyo râ bang, ra-am lé, hpúng-up pé eq sará pé kut tsing byî to bê nghut ri.

¹² Haû bang gi, Garai Gasâng é byu pé lé wùn waq âng é muzó pê é matú, hen lajâng é bang nghut ri. Haû hkûn sheq, Hkrisduq é gungdu gi,

¹³ haû lumjíng hkyô eq Garai Gasâng é Yhangzo lé sê é hkyô má, nga-nhúng banshoq bang rading ralhú za wó dut mù, kô ðing bang dut luî, Hkrisduq é gumjup é isâm banshoq lé wó yu é hkûn jé shoq, wó kô jat nyî râ nghut lhê.

¹⁴ Haû mù, nga-nhúng gi, wuibaù pé èq hí shut htâng shut bat myhû é su dut é eq, byu pé é agè ashop é eq haq dâ é mhoq hpyoq hpaqchyî pé eq mhoqshít hkyô laidun hkgangmó èq, shí shut hé shut mut tâng é su dut é lé hui zô é zoshâng wui su a nghut lô é za,

☆ 4:8 Hkya-on 68:18

15 chyitdap myit mai tengmán é dang lé taí nyi jáng, Hkrisduq nghu é ulhum má hkyô hkanmó kô myhang lò râ nghut lhê.

16 Yhang đông mai, gungdu gón gi, ralhumm eq ralhumm htuqbâng é gungsho showui showang pé lé xoq byi to bê nghut mù, gungsho showui showang haú pé gi, yhumsing é muzó lé zui saí nyi é nghut jáng, gungdu haú gi, chyitdap myit má, yhanggùng yhang kô lò myhang lò râ nghut lhê.

Byù Sik Đông Asak Dui Râ Hkyô

17 Haú mù lui, haú Yhumsing é ahko ahkáng mai ngò nungmoq lé taí nau é hkyô gi, haú tưngbaù pé gi, akyû a bo é lé myit mù, asak dui kô é su, nungmoq gi, hkâkut kó.

18 Yhangmoq gi, sê gyô é nyan chut byuq bekô nghut é eq yhangmoq myit htan nyi kô é nghut mù, haí le a sé kô é yanmai, Garai Gasang byi é asak eq wê gâng byuq bekô nghut ri.

19 Yhangmoq gi, gyuq hoq hkyô a bo byuq lo kô é yanmai, myoqnoq myit đông a sansêng é hkyô jung hkanmó lé je wó kut xoq nyi shoq ga, yhumsing gùng lé, gungsho ô naù gadaú é hkyô má ap pyám bekô nghut ri.

20 Nungmoq kúm gi, Hkrisduq é hkyô lé haú đông mhoq yu kô é a nghut.

21 Nungmoq gi, Yesuq chyáng mâ é tengmán hkyô đông, Yhang é hkyô lé wó gyô wú é eq mhoq yu wú bekô nghut lhê.

22 Haú mù, nungmoq gi, hí hpyang lhê é nungmoq é nyi yap sâmlai nghut é, ô naù gadaú lui, yhumsing gùng yhumsing mhaù pyám é đông htên

byoq ló nyi é nungmoq é byù xau lé tô pyám râ matú mhoq yû bê eq rajung za,

²³ nungmoq é i-myt lé asik htaî pyám nhâng keq;

²⁴ hau htoq agó, nungmoq gi, tengmán é eq sêng é dingmán hkyô eq chyoiyúng hkyô má, Garai Gasang eq dù shoq hpan to hui bê nghut é byù sik lé, yu wut to keq.

²⁵ Haû mù, nga-nhúng banshoq bang gi, gungdu ralhum é gungsho showui showang pé chyat nghut é yanmai, nungmoq yuq hkanmó gi, mhaû é hkyô lé tô pyám luí, yhumsing é chyangnâm mâ é sù lé, tengmán é dang taí ra râ nghut lhê.

²⁶ "Nungmoq nhikjum yô é hkûn, mara hkâkut kó."✧ nungmoq gi, bui wàng shoq nhikjum hkâyô nyi kó.

²⁷ Nat Tsadán lé le, jowò hkâbyi kó.

²⁸ Hkau sù gi, a dum hkau lo sháng gaq; râ nyi é bang lé, rajung jung wó gâm byi shoq, yhumsing é loq eq akyû bo é hkyô pé lé kut nyi luí, muzó zui shikut ra râ nghut lhê.

²⁹ Nungmoq é nhut mai agè agaú é dang haî le hkâhtoq nhâng kó; wó gyô é bang akyû bò shoq, yhangmoq râ tô é má cháng luí, haú bang kô lam lò râ dang za taí keq.

³⁰ Haû hkyi yù râ buinyi é matú, dizik đông nungmoq lé tap to byi é Garai Gasâng é Chyoiyúng Woi-nyí lé hkâlhoq yón kó.

³¹ Haû myit tot é, nhikjum yô é, nhik-yô é, byoq lhum byoq cheq é eq lumù gansang é, agè agaú é hkyô pé banshoq lé, nungmoq tô pyám keq.

✧ 4:26 Hkya-on 4:4

³² Nungmoq gi, rayuq eq rayuq, ge é hkyô eq shogyo nhikmyin é hkyô tún shit lhum luî, Garai Gasang gi, Hkrisduq má, nungmoq lé mara hkyut byî é su, nungmoq yhangchang le mara hkyut byî lhûm nyî keq.

5

¹ Haû mù, nungmoq gi, chyitdap dik é zoshâng wuì nghut é yanmai, Garai Gasang lé alik yu é bang kut keq.

² Hkrisduq gi, Yhânggùng lé namngón jung hkungga eq shigu hkungga dông, nga-nhùng é matú Garai Gasâng chyáng Yhânggùng yhang ap byî pyám shoq, nga-nhúng lé chyitdap é su, nungmoq le chyitdap myit èq asak dui nyî keq.

³ Hau htoq agó, ashop é dông gungsho zùm yap é hkyô, a sansêng é hkyô hkangmó eq myoqnoq é hkyô pé lé, nungmoq taí lháng hkâtaí kó; hkâsu mù gâ le, nungmoq gi, Garai Gasâng é chyoiyúng byu pé nghut lhê.

⁴ Haû eq rajung za, a taí gíng é, ahoq ahî dang, dangsôm eq hkunchaq dông gyâ é dang pé lé a taí é za, jeju hkya-on dang za taí nyî keq.

⁵ Hkâsu mù gâ le, ashop é dông gungsho zùm yap é hkyô kut shut sù, a sansêng é sù eq hparà noq é sù nghut é myoqnoq sù ó yuq nghut kôlhang, Hkrisduq eq Garai Gasâng é mingdán má muizè a wó é hkyô lé, nungmoq sê nyî keq.

⁶ Ó yuq nghut kôle, dangsôm* dông mai nungmoq lé a wó mhaú kó sháng gaq; hkâsu mù gâ le, haú hkyô pê é yanmai, Garai Gasâng é nhikmo-yo

* **5:6** *Dangsôm gâ é gi, Garai Gasâng é nhikmo-yo hkyô a jé râ ga taí é dang nghut lhê.*

hkyô gi, haû jìno a gyo bâng é ahtoq má jé râ nghut lhê.

⁷ Haû mù luî, haú bâng chyáng hkâbo wang lòm kó.

⁸ Hkâsu mù gâ le, nungmoq gi, hí hpyang mauchut tuq dut é bang nghut lhê; nghut kôhang, ahkuî gi, haû Yhumsîng má maubó pé nghut bekô nghut ri.

⁹ Haû Yhumsîng ô nau é hkyô haî nghut é lé ho htoq yû mù, maubó é yhangzô pé dông asak dui keq.

¹⁰ Hkâsu mù gâ le, haû maubó é ashî gi, ge é hkyô banshoq, dingmán é hkyô eq tengmán hkyô chyat nghut ri.

¹¹ Haû ashî a zuî é mauchut tuq muzó má a bo wang lom é za, yhangmoq é mara lé tân shit keq.

¹² Hkâsu mù gâ le, haû jìno a gyo bang haq zaú kut é hkyô lé gi, taî htoq le lháng hoq hpo nghut ri.

¹³ Nghut kôhang, junghkang jungmó lé, haû maubó èq tân shit jáng gi, wó byu-myang é chyat dut râ nghut lhê.

¹⁴ Hkâsu mù gâ le, junghkang jungmó lé byu-myàng nhang é gi, maubó nghut ri. Hau é yanmai, "Yhup ngón nyî sù ê, toq aq, haû shî é mai dui toq aq hkoi; haû jáng, Hkrisduq gi, nang lé duqbó byi râ nghut lhê."[†]
ga luî taî tô é nghut lhê.

¹⁵ Haû mù luî, nungmoq hkâsu kut asak dui é hkyô má gyai sidiq nyî keq; hpaqchyî a bò bang su a nghut é za, hpaqchyî bò bang su kut nyî keq.

[†] **5:14** Dang ngho shî gi, hí lhê é noqkuq hpûng pé taî gyó lo é dang nghut lhê.

16 Buinyì ahkyíng shí pé gi, agè ashop é yanmai, wó é ahko ahkáng banshoq lé ge dik é dông chung jài keq.

17 Hau é yanmai, byù ngok pé a dut é za, haù Yhumsíng ô nau é hkyô gi, haí nghut é lé, sê gyô yu nyì keq.

18 Haù achaq achyut é yubak hkyô lhoq htoq é í lé hkâshuq wut kó; Woi-nyí lé kúm byíng nhang nyì keq.

19 Nungmoq gi, hkyá-on kungtôn dang dông le, hkyá-on mahkôn dang dông le, woi-nyí eq sêng é mahkôn dông le, rayuq eq rayuq dáng nyo lhum luí, nungmoq é i-myt unghkaù mai, haù Yhumsíng lé mahkôn hkôn mù, lhoq ngón nyì keq.

20 Nga-nhùng é Yhumsíng Yesuq Hkrisduq é myìng lé lang luí, jung hkgangmó é matú, haù Íwa Garai Gasang lé, hkâ-nhám le jeju hkyá-ôn nyì keq.

21 Hkrisduq lé hkungga hpautap é myit eq, rayuq eq rayuq hpautap lhùm nyì keq.

Myi Eq Làng

22 Ikun myhí pé ê, haù Yhumsíng uphkan é dông châng é su, nungmoq é ikun hpô pé uphkan é dông châng nyì keq.

23 Hkâsu mù gâ le, Hkrisduq gi, haù noqkuq hpûng é ulhum nghut é su, haù ikun hpó gi, ikun myhí é ulhum nghut nyi ri; Hkrisduq gi, haù Yhâng gungdu nghut é noqkuq hpúng lé hkyi yù Sù nghut ri.

24 Haù noqkuq hpúng gi, Hkrisduq uphkan é dông châng é su, ikun myhí pé le, hkyô hkat hkgangmó má, yhangmoq é ikun hpô pé uphkan é dông châng nyì râ lhê.

²⁵ Ikun hpô pé ê, Hkrisduq gi, haû noqkuq hpúng lé chyitdap luî, hau é matú Yhânggùng lé Yhang ap pyâm é su, nungmoq é ikun myhî pé lé chyitdap nyi keq.

²⁶ Yhang haû su kut é gi, haû noqkuq hpúng lé, mungdang dông wuì má chí pyám luî, lhoq sân-yúng yû râ eq,

²⁷ haû noqkuq hpúng gi, agè agáu é eq a-ká akông é hkyô haî le a bo é za, mara hûn râ hkyô a bo é eq chyoiyúng é, hpungwup shingkang bo é noqkuq hpúng dông, Yhânggùng lé wó ap byi râ matú nghut lhê.

²⁸ Haû eq rajung za, ikun hpô pé gi, yhangmoq é ikun myhî pé lé, yhumsing gungdu lé su chyitdap râ dut lhê. Yhumsing é ikun myhî lé chyitdap é sù gi, yhumsing gùng lé le, chyitdap é sù nghut bê.

²⁹ Ó yuq le, yhumsing gùng lé a chyitdap a kut é za, Hkrisduq gi, haû noqkuq hpúng lé kut byi nyi é su, yhumsing gùng lé byi tso byi huq luî, rago wú zúng nyi é nghut lhê.

³⁰ Hkâsu mù gâ le, nga-nhúng gi, Yhâng é gungdû é gungsho showui showang pé chyat nghut lhê.

³¹ Haû mù, "Hau é yanmai, yuqgè gi, înu îwa eq gang luî, yhangmyi eq zùm-yap mù, yhangnhik í yuq gi, gungsho ralhûm za dut kó râ nghut lhê."✧ gâ tô ri.

³² Haú hkyô gi, gyai yhang zaú tô é hkyô nghut ri. Nghut kôlhâng, ngò gi, haû Hkrisduq é hkyô eq noqkuq hpúng é hkyô lé taî nyi é nghut lhê.

³³ Haû mù, nungmoq yuq hkangmó gi, yhumsing gùng lé chyitdap é su, yhumsing é ikun myhî lé

✧ 5:31 Apûn 2:24

le chyitdap râ dut lâ; haû ikun myhí le, yhâng é ikun hpó lé hkungga râ dut lâ.

6

Zo Wuî Eq Mó Wui É Hkyô

¹ Zoshâng wui ê, haû Yhumsîng má, nungmoq é mó wui é jìno gyo keq; hkâsu mù gà le, haû gi, kut gíng é hkyô nghut ri.

² "Náng é înu îwa lé hkungga aq.

³ Haû jáng, nàng, nyì ngón yuqyò mù, myidàm htoq má náng é asak chyungxe hing nyì râ nghut lâ."☆ gà é dang gi, danggidiq lom é sâng-hî lhum hkunmó nghut ri.

⁴ Îwa pé ê, nungmoq é zo wui lé nhikjum a lhoq yô é za, haû Yhumsing é mhoq kyo hkyô eq mhoqshit lhoq pun hkyô dông yhangmoq lé baú kô nyì keq.

Jùn Pé Eq Junsing Pé É Hkyô

⁵ Jùn pé ê, nungmoq gi, Hkrisduq é jìno gyô é su, gyuq hkunggâ é eq lhumzuí é myit mai, nungmoq é myidàm htoq mâ é junsing pé é jìno gyo keq.

⁶ Nungmoq gi, yhangmoq é hí má za, myoqdong ho é dông kut é a nghut é za, Hkrisduq é jùn pé su, Garai Gasang ô nau é hkyô lé, nungmoq é i-myit unghkaû mai châng kut nyì keq.

⁷ Byù lé za dojaú é dông a nghut é za, haû Yhumsîng lé dojaú nyì é dông le, shirông myit èq dojaú nyì keq.

⁸ Hkâsu mù gà le, jùn nghut nghut, luthkyô wó sù nghut nghut, ge é hkyô kut nyì é nghut jáng, haû

☆ 6:3 Htoq Ló 20:12

Yhumsîng gi, yuq hkangmó lé shigyaú râ nghut é lé, nungmoq sê nyi lhê.

⁹ Junsîng pé ê, nungmoq le, nungmoq é jùn pé lé haû eq rajung za kut byî nyi keq. Yhangmoq lé hkâkyuq zo kó; nungmoq sê é eq rajung za, yhangmoq eq nungmoq é Yhumsîng hpó gi, mauhkûng htoq má nyi é nghut luî, Yhang gi, myoqdong hkyin é hkyô a bo é sù nghut lhê.

Garai Gasâng É Gyè Hking

¹⁰ Ló htâng má, taí nau é hkyô gi, haû Yhumsîng eq Yhâng é hpungwup a-tsam mó má wum-o bo nyi keq.

¹¹ Haû nat Tsadán wá dâ é hpaqchyî pé lé, nungmoq wó he-ngik pyám kó sháng gaq, haû Garai Gasâng é gyè hking banshoq lé wut to keq.

¹² Hkâsu mù gâ le, nga-nhúng gi, gungsho eq sui lé htuq htîng é bang a nghut é za, haû uphkâng bang, ahkáng ayá wó bang, mauchut tuq dut é mingkan shi é a-tsam pé eq mauhkûng htoq tsáng myhâng mâ é agè ashop é byò eq sêng é wum-o pé lé, htuq htîng é bang ru nghut lhê.

¹³ Haû mù luî, Garai Gasâng é gyè hking banshoq lé wut to keq; haû hkûn sheq, nungmoq gi, agè ashop hkyô jé é buinyi má, yhumsîng jowò má wó yap gîng to mù, hkyô hkat hkangmó lé ban kut jáng, wó yap gîng tîng nyi kó râ nghut lhê.

¹⁴ Haû mù, nungmoq é hpyidum má tengmán hkyô hpyihit hit mù, dingmán hkyô wànggò-long lé gò luî,

¹⁵ nungmoq é hkyî má gi, haû simsaq hkyô byî é gabú danglù hkô râ rì rì kut to mù, gîng gîng yap nyi keq.

¹⁶ Hau htoq agó, haû agè ashop su é myiduq é myoshi lhunglháng lé wó sat ung pyám râ matú, lumjínq hkyô nghu é golong lé chung to keq.

¹⁷ Hkyi yù hkyô shamtoq muq lé tsùng to luî, Garai Gasâng é mungdang nghut é, haû Woi-nyí é shâm lé wun chûng keq.

¹⁸ Ahkyíng hkgámó má, kyûdung dang eq dúng tôngbán é dang ajung jûng eq, haû Woi-nyí má kyûdung nyi luî, machya nyi uchyang, sân-yúng bang banshoq é matú, hkâ-nhám le, xoq xoq kyûdung byí nyi keq.

¹⁹ Haû gabú danglu é yanmai, shamtoq-tui hut huí é lagyo rayuq ngò nghut nyi kôlháng, haû gabú danglù nghut é zaú tô é hkyô lé, a gyuq a wàm wó taí kyo luí,

²⁰ ngò taí râ dut é lé, a gyuq a wàm wó taí sân kyo shoq, ngá nhut hpóng hkgámó, ngò taí râ mungdang pé lé byi sháng gaq, ngá é matú le, kyû bo dung byí nyi keq.

Shi-kyám Dang

²¹ Haû Yhumsîng má, chyitdap é gumang eq lhumzuí é dui-nhâng zoshâng nghut sù, Tuhkiku gi, nungmoq lé jung hkgámó taí kyo râ nghut luî, ngò hkâsu nghut nyi é hkyô eq haí kut nyi é hkyô lé, nungmoq wó sé kó râ nghut lhê.

²² Ngamoq hkâsu nghut nyi é hkyô lé, nungmoq wó sé râ eq, yhang, nungmoq lé myit wum wó byi râ matú za myit myoqbyù luî, yhang lé, ngò, nungmoq chyáng nhang kat é nghut lhê.

²³ Îwa Garai Gasang eq Yhumsîng Yesuq Hkris-duq chyáng mâ é lumjínq hkyô má bo é chyitdap

myit eq ngingón hkyô gi, haû gumang wui chyáng
ru joq nyî sháng gaq ô!

²⁴ A dat htûm é chyitdap myit mai, nga-
nhûng é Yhumsîng Yesuq Hkrisduq lé chyitdap
é lhunghâng bang chyáng, Garaî jeju gi, ru joq nyî
sháng gaq ô!

Chyoiyúng chyumlaiká: dangshikaq asik; Zaiwa

New Testament in Zaiwa

copyright © 2009 Wycliffe Bible Translators, Inc.

Language: Zaiwa

Translation by: Wycliffe Bible Translators, Inc.

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9781921445408

The New Testament

in Zaiwa

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses,

please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022

23f9fc55-a8a4-59ef-9513-707ec336b0ee